

## LA EPISTOLA DEL APOSTOL SAN PABLO A FILEMON

# YA'A KUU CARTA JA NI CHAA SAN PABLO APOSTOL NUU FILEMON

<sup>1</sup>Máa-rí kúu Pablo, te kánde-ri vekaa ja sikí Jesucristo te jíin ñani-yo Timoteo katáji-rí tutu yá'a nuu-ro Filemón, chaa mani jíin-rí kúu-ró, te chíndéé tá'an-ró jíin-rí. <sup>2</sup>Suni káchaa-ri tutu yá'a nuu Apia, ña'an maní jíin-ró, jíin núu Arquipo, chaa chíndéé tá'an jíin-rí sikí tínu kándúku ndéé-rí yá'a, jíin núu tiku'ni kákandíja ío ini ve'e-ró jíin. <sup>3</sup>Tu'un luu ío ini-ya jíin tú'un kuaká'nu ini ja kii nuu máa Taa-yo Dios jíin ja kii nuu máa Jíto'o-yo Jesucristo ná koo jíin-ró jíná'an-ró. <sup>4</sup>Nákuatá'ú-rí nuu Dios máa-rí, te nene núku'un ini-ri róo, nú jikán ta'u-rí nuu-yá. <sup>5</sup>Chí a jíni so'o-ri ja bueno kákundá'ú ini-ro táká ñayivi ndóo, te kándíja va'a-ró núu máa Jíto'o-yo Jesús. <sup>6</sup>Te jikán-ri nuu-yá náva'a nú kájani-ró tú'un te ná skándíja va'a-ró-i, te kuní káji-i taká tínu va'a káñava'a-yó jíin Cristo Jesús. <sup>7</sup>Chí kákusií xáan ini-ri, te ká'io ndéé ini-ri, ja súan kákundá'ú ini-ro-í, chí ja róo ñáni, te ni nani'in-gá ini añú ñayivi ndóo.

**Ja ní ka'an Pablo ja'a Onésimo**

<sup>8</sup>Núsáa te vasa kuu chundéé ini-ri, sá'a Cristo, ja tá'ú-rí tínu

nuu-ro núu, ja ná skíkuu-ró tínu va'a, <sup>9</sup>chí sua va'a-ga ná ká'an nda'ú-ri jíin-ró ja jíin sikí ja maní-ro jíin-rí, jíin sikí ja rúu kúu Pablo, chaa ni yii jíin ja kánde-ri vekaa ja sikí Jesucristo. <sup>10</sup>Núsáa te ká'an nda'ú-ri jíin-ró ja ná sá'a-ró tüká'nu ini-ro núu sé'e-ri Onésimo, chí a ni skándíja-ri-i nini kánde-ri vekaa. <sup>11</sup>Te suchí yá'a, tú ní ní'in tínu-i nuu-ro sáa, ko vina, chí bueno ní'in tínu-i nuu-ro jíin núu-rí. <sup>12</sup>Te ná natáji-rí-i najaa-i nuu-ro. Te kuatá'ú-ró-i, nátu'un ruu, chí iin-ni kákuu-ri jíin-i. <sup>13</sup>Te kúsií ini-ri ja kúnchaa-i jíin-rí te kuu-i yu'u núu-ro kuátínu-i nuu-rí núu, nini kánde-ri vekaa ja sikí máa tú'un va'a. <sup>14</sup>Ko tú ní kuní-ri sá'a-ri súan, onde nú tú kuatú'un máa-ró, chí nasu stétuu-ri róo sá'a va'a-ró, chí sua sikí ja játa'an ini-ro. <sup>15</sup>Chí sanaa te ja sikí yúan kúu ja ní jinu-i ni jito-i róo yaku tiempo ni sá'a-ya, náva'a kuu naki'in-ró-i te ma sía tá'an-ró jíin-i ní káni. <sup>16</sup>Te ma káni-ga ini-ro ja mozo kúu-i, chí va'a-ga koo-ró jíin-i vása jíin mozo nátu'un

mani-ro jíin ĩn ñani-ro, chí súan jáni iní-ri jíto-ri-i. Ko ví'í-gá kúu máá-i nuu máá-ró ja sikí tá'an-ró kúu-i jíin já sikí máá Jító'o-yo.

<sup>17</sup>Núsáá te nú jiní máá-ró já cháa chindéé tá'an jíin-ró kúu-ri, te ná kuatá'ú-ró-i, nátu'un ruu núsáá.

<sup>18</sup>Te nú naún falta ni sá'a-i jíin-ró, xí taú-i nuu-ro, te sikí máá-rí ná chí'i-ró cuenta. <sup>19</sup>Máá-rí kúu Pablo, cháa-ri tutu yá'a jíin ndá'a máá-rí, te máá-rí chunáa. Súan ká'an-ri lugar ja ká'an-ri ja súni onde jíin máá-ró jíin añu-ro taú-ro núu-rí. <sup>20</sup>Jándáa ñáni, kuní-ri ja ná kúsi iní-ri sá'a-ró sikí tíñu máá Jító'o-yo. Te ná nání'in-gá

iní-ri sá'a-ró jíin máá Jító'o-yo.

<sup>21</sup>Cháa-ri tutu yá'a nuu-ro, chí kúva'a iní-ri ja kuándatu va'a-ró, te jiní-ri ja skíkuu-ga-ro vásá já ní ka'an-ri jíin-ró. <sup>22</sup>Te suni kuní-ri ja sátu'a-ró nú kúnchaa-ri, chí ñúkuu iní-ri kenda-ri yá'a te jaa-ri nuu-ro, sá'a-ya jíin tú'un jikán ta'u-ro já'a-rí. <sup>23</sup>Te Epafras, cháa kándeé ta'an jíin-rí vekaa yá'a ja sikí Cristo Jesús, ká'an-de ja násándéé iní-ro. <sup>24</sup>Te Marcos, Aristarco, Demas, jíin Lucas, cháa kásatiñu ta'an jíin-rí, suni súan káka'an-de. <sup>25</sup>Tu'un luu ío iní máá Jító'o-yo Jesucristo ná kóo iní-ro. Súan ná kóo. Amén.